

四庫全書

集部

欽定四庫全書

少室山房集卷五十

明 胡應麟 撰

七言律詩七十九首

余為五岳之懷舊矣丙子冬將以計偕北上適
少參王公自秦中過訪為余劇談蓮花玉女
之勝且出諸登覽作見示恍然如曳杖從公
遊憩太華絕頂者不勝飛動之思輒賦七言

律四章

縹緲青天華岳西萬峰雲色繞丹梯行窺日月中華盡
坐倚星辰太白低陰洞古壇猶積雪斷崖飛瀑幾留題
知君苦覓驚人句不奈清猿絕頂啼

五夜扳蘿到絕巔俯看城郭帶秦川攜將太華峰頭月
獨聽終南樹杪泉千里河山朝白帝九霄雲霧失青蓮
探奇漫倚孤筇嘯咫尺瑤臺是列仙

片片青霞屐底移半空岩壑轉逶迤悲風萬里來三蜀

落日遙天斷九疑渭水秋光猶殿閣昆池寒影自旌旗
狂來健翮飛揚甚翹首寧論謁帝遲

歷盡飛泉到上頭白雲迴望滿皇州千峰不斷秦關色
萬壑長懸漢樹秋赤日陰森猿語亂蒼烟明滅鳥飛愁
何因瓢笠相從去醉踏蓮花問斗牛

初至都下康裕卿李惟寅胡文父何仁仲朱汝
修過訪

翩翩裘馬又長安握手風期尚未闌白雪舊知心賞在

青山猶作夢魂看燕臺日落星應聚函谷雲生氣自寒
却笑五年江海上飛鴻何處不憑闌

夜同黎惟敬康裕卿胡文父何仁仲朱汝修集

李惟寅宅得寒字

握手論心盡鵷冠相逢何意復長安衣裁薜荔元同色
劍合芙蓉好並看明月萬家閭闔曉青山十載路岐寒
憑陵欲望燕臺氣一片星河繞畫闌

贈沈比部純父

八詠風流自古聞一時江左更休文朝端玉珮趨明月
署裡金珂冷白雲入夜驪珠真射斗高秋龍種欲空羣
孤帆忽漫雙溪去千里那能不憶君

同殷無美胡文父魏茂權集歐楨伯博士得情
字

才子初尋碣石盟一尊遙望五雲平當軒似落梅花色
入座俱含桂樹情四壁春陰迴禁苑萬家殘雪擁高城
翻憐舊日羅浮客不向詞壇識姓名

送裕卿二首

貫酒都亭旅思長
相看那忍別離觴
單車客去華陽社
萬里人歸越嶠霜
岐路東西空哽咽
乾坤南北共行藏
丹霞樹樹秦源底
尺地還堪寄草堂

一夜驪歌繞薊門
青山何處不銷魂
懷鄉杜甫心元壯
去國張儀舌尚存
夢斷河梁燕雪阻
星移嚴瀨海雲昏
他時倘問蘭陵宅
風雨猶堪共一樽

南歸留別無美文父茂權二首

落日長安涕泗流，飛揚誰信五陵遊。
中原彩筆猶天地，故國寒槎自斗牛。
抱璞已甘和氏刖，凌雲無奈長卿愁。
南歸是處山堪臥，敬枕嚴陵萬疊秋。

擊筑長歌且未哀，紛紛詞藻栢梁臺。
人因李邵登龍挫，客自昭王市駿迴。
孤劍霜飄南斗近，萬舟雲擁北風來。
碧山幸有藏書穴，誰遣潛夫出草萊。

夜同裕卿諸子集惟寅宅得中字

一夜心期握手中，吳鉤寒色照長空。
新愁紫氣重關外，

舊宅青山大海東摧落世應疑
斥鷃翻飛人豈后冥鴻
高歌斲向淮王席千載休論桂樹叢

留別惟寅汝修

攜手都門話息機
筑傍愁見和人稀
千山積雪盧溝斷
萬里寒雲碣石飛
紫禁未前明主席
青門頻把侍臣衣
尺書何處堪相望
天地東南一少微

別祝鳴皋

砍地哀歌氣尚雄
十年詞賦與君同
琴聲一奏風塵下

劍色雙懸宇宙中，已信君平堪市隱。何來阮籍尚途窮，
心期不道天南北。對握驪珠望彩虹。

潞河舟中同裕卿文父作

羸馬風塵鬢色愁，一帆同下海門秋。星辰自合雷張劍，
岐路真逢李郭舟。青嶂五湖寒並倚，白雲三楚暮爭流。
支機滿袖瓊瑤在，不信銀河祇獨遊。

寄大司空朱公

萬峰晴護草堂寬，帝許司空整挂冠。兩鬢自懸滄海白，

寸心猶傍紫宸丹垂天翼駐風雲繞挾日鱗藏洞壑寒
不信渭濱能久臥東南佳氣滿長安

寄何內翰

彩筆翩翩奉紫宸鬱葱佳氣滿平津金門露映然藜客
玉座雲隨視草臣司馬大名懸日月賈生愁色轉風塵
清尊萬里論心夜腸斷梅花驛路春

寄朱在明鴻臚

神武秋風萬木殘扁舟回首隔長安飄零敢挾齊門瑟

潦倒誰論魏闕冠
白紵總邀遊伎舞
青萍長向酒人寒
傷心碣石談天處
寂寞浮雲夢裡看

登天津閣望海同康裕卿胡文父作二首

畫檻橫空海色開
一尊攜客上崔嵬
扶桑日傍千帆落
碣石雲浮萬島迴
採藥未應徐市老
垂風聊擬羨門來
仙居咫尺蓬壺近
指點憑誰出草萊

百尺欄干望未涯
寒烟遙護海門斜
羣峰亂吐崑崙日
疊浪瀕翻渤澥霞
薄暮機絲鮫客館
中天樓殿羽人家

攜來並有玄虛賦為寄銀河八月槎

為文父題匡山讀書處

面面烟霞護草堂千峰遙墮子雲牀琅函盡敞三墳色
玉軸新開二酉藏藜火夜寒迴太乙桂叢秋遠夢淮王
東林剩有逃名地不奈聲華滿栢梁

薜蘿館為裕卿題

縹緲烟蘿護石扉幽軒十尺迥忘機吟窺彩筆青雲墮
坐擁瑤琴白雪飛洞口經春詞客興山阿薄暮楚臣衣

深居莫訝時人識
夜夜寒光動少微

竹在亭為王孫貞吉題

清風何處洒琴書
面面琳琅雪雨餘
千畝畫圍中散宅
萬竿晴拂子猷居
聲搖淇澳來中坐
翠擁瀟湘護碧渠
尊酒欲尋長嘯客
美人空谷正踟躕

同詹東園康裕卿胡文父集胡上舍館有贈

大隱何妨卜市廛
華裯長日擁嬋娟
吟餘河朔堪消暑
住久臨邛不記年
千里壯心慙驥櫪
九霄寒色舞龍泉

長安此夜占星斗半入荀陳座裡懸

送黃孔昭還七閩

匹馬何來自薊城蘭皋攜手白雲平長裾尚曳三峰色
短劒初回五岳行夾岼帆檣漳水夜中天臺觀武夷晴
離尊咫尺空相望愁絕華陽社裏盟

艾都閭見過不值

飛花長日掩柴關小隊俄來曲巷間上客已驚題鳳去
元戎誰共射鵬還青天畫甲嚴城迥明月牙旗大海閒

聞道漢南諸將在幾人名姓動陰山

寄胡文父

潦倒公車記昔遊青絲白馬並皇州
霜華夜拂高離筑雪片朝寒杜甫裘
一代風期誰獨往百年肝膽自名流
相思倘逐飛鴻翼綵筆同攜八詠樓

送王先輩還二華

匹馬言歸太華顛五陵行色暮飄然
遊吳衛玠名偏重入越中郎賦已傳
白閣雲霞孤劍底黃河星斗一尊前

無嗟片語天南北屈指看花漢殿年

寄徐子與

車騎輝煌列上游幾年方岳擅風流
西山萬樹浮官閣南浦千花入郡樓
授簡客知王勃在據床人憶庾公留
毋誇石匣豐城畔振珮遙看接斗牛

寄李惟寅兼訊朱山人汝修

朝懸鵲印坐長楊鋒鏑平銷一劍霜
射虎乍聞過灞岸飛龍猶憶賦河梁
丹心自照論兵地青眼頻輸結客場

獨有夷門舊賓從偏從長揖問容光

聞安茂卿遊臨安作此問訊

飛揚裘馬各遊秦拂袖俄驚海上春三洞稍酬新日月
五陵猶記昔風塵紛紜白眼空調世濩落紅顏已讓人
聞道如花仍共載若耶溪色定誰親

喜滕公擢任浙中方伯二首

叱馭遙看五嶺來雙旌薇省暫徘徊三朝驟起吹噓色
十道誰先撫字才赤日扶桑過露冕青山鄞海傍登臺

謳歌豈獨東南借繞夜寒光接上台

南來海色傍旌旗猶似橫經越嶠時華省坐開新氣象
青衿傳迓舊威儀籌輸九塞軍儲集珮壓三曹帝寵移
屈指侯芭曾問字十年長缺未酬知

送喻邦相之都下

臥掩衡門病色侵相逢詞客重開襟孤尊斲詫梁園集
萬里仍趨魏闕深風雨大江隨擊楫雲霄赤縣待橫琴
殷勤片諾他年事北望鴻書灑水潯

送張明府移任江右

擁轍千家泣道旁飛書誰為轉循良清霜乍徙朝歌署
白雪俄深單父堂柳色映簷江浦近梅花入夢海天長
極知百里非重借曳履晨看到尚方

中秋夜同諸君鎮海樓玩月

縹緲銀蟾落庾樓憑高一望海雲收千林露色天如洗
萬井河光地欲流大漠旌旗誰倚嘯長門環珮迥添愁
追陪正憶羣公語莫訝胡床竟久留

寄邊上友人

早聞詞賦擅西京更羨終軍獨請纓
萬里旌旗分漢壁十年刁斗隔燕城
雲沈瀚海風沙起雪滿交河道路平
堪笑故人猶短褐欲將孤劍事長征

送人入蜀

離思翩翩把濁醪錦城西去不辭勞
星辰夜拂張華劍風雨寒生范叔袍
三峽啼猿青嶂遠九疑迴雁碧天高
蜀中形勝堪憐汝定把新詩吊薛濤

送徐明府之瓊州

春花繚繞鳳凰樓，襟被憐君賦遠遊。
風俗自分天外郡，山川愁問海南舟。
珠崖雲氣經秋斷，瓊島波光入夜浮。
惆悵一尊芳草畔，不堪離恨對吳鉤。

秋日送人之洛中

挾策憐君出漢關，驅車晴色滿山川。
浮雲半落漳河水，寒日斜分博望烟。
龍劍獨攜星斗外，鴻書遙寄雪霜前。
綈袍對拂雙蓬鬢，猶是京華旅食年。

送中丞魯公之成都

使者新傳諭蜀章
朱衣晴日下明光
揚旌欲挂峨眉雪
拂劍遙生灩澦霜
幕府夜談賓滿坐
山郵朝發吏成行
共誇僕射詩情在
小隊時能過草堂

花朝思伯邀同諸子集李氏園亭

綠野晴開一徑斜
夕陽聯騎到山家
綈袍乍擁梁園雪
綵筆先飄漢殿霞
大麓春陰迴遠樹
高城霜色墮清笳
看花剩有劉郎興
十載長安鬢欲華

清源道中別裕卿二首

十日平原飲未闌，更攜離色上征鞍。
浮雲萬里幽期隔，明月千峰旅夢寒。
片諾久知肝膽盡，深交那問髮毛殘。
孤帆歲暮能相過，風雪桐江有釣竿。

幾夜風雲入倡酬，一朝岐路攬吳鉤。
天懸大陸雙龍語，霧擁寒山尺馬愁。
憶戴未闌王子興，登仙猶滯李膺舟。
秋期倘問垂綸客，散髮同看大海流。

齊東道中

羸馬經行日草萊齊東遙望海雲開春光芑父層城合
曙色瑯琊萬井迴織屨自高陳仲隱飛書誰問曾連才
遺踪九合俱零落滿目晴花度野臺

懷史元秉李惟寅朱汝修

浩渺春光接漢關金莖遙望五陵間詩成碣石人猶聚
賦罷長楊客已還碧漢鷓鴣堪並起青門鸞鶴幾同閒
芒鞋莫問天台色萬樹桃花照玉顏

同文父登泰山四首

百轉丹梯上翠屏
天門遙望海冥冥
幽燕北護諸陵紫
齊魯東迴萬壑青
松色自搖秦帝輦
芝封猶駐武皇靈
殘碑七十俱塵土
千載憑誰問勒銘

縹緲飛雲十八盤
高臨迴首盡長安
青天萬仞樓臺立
白日千重杖履寒
若木煙光浮帝闕
扶桑霞影落仙壇
相攜並倚孤鸞嘯
不向遙空問羽翰

獨夜行吟到斗牛
闌干遙倚碧天愁
千峰日抱秦臺上
萬嶺雲爭漢碣流
絳節先生羣帝語
玉扉寒啟衆靈遊

吹笙不淺王喬興杖履何年更十洲

面面芙蓉立紫烟石門丹壑迥相連遙峰霧擁星河出
絕頂天迴日月懸玉碣尚傳司馬後蒼松誰問祖龍年
相看十載沈冥意梁父吟成共黯然

送文父還匡廬

涕淚江湖范叔袍相看愁色轉蓬蒿人歸廬岳千峰雨
夢阻潯陽八月濤酒畔蓮花傳般若窓前桂樹詠離騷
臨岐漫脫干將珮斗氣雙懸日月高

再寄朱大司空

玄圭曾告萬年功，歸去堂開綠野中。
聖主自尊前尚父，蕃人來問大司空。
吟邊駕引新調鶴，臥裡車懸舊賜熊。
愧殺酬知長劍士，白雲無路到崆峒。

別李季宣

萬里澄江片月虛，故人相望轉踟蹰。
寒星欲墮張華劍，遠道仍驅孟博車。
獨夜魚龍京口夢，高秋鴻雁廣陵書。
花時好訂吳天約，題偏樓臺四百餘。

同茅平仲登甘露寺絕頂作

天畔危亭綉拱扶並遊詞客摠江湖千山雪浪吹樓殿
萬里雲帆下舳艫秋色平分瓜步遠暮烟斜合景陽孤
興亡六代俱陳迹對倚西風盡玉壺

重遊金山四首

海色迢迢四望齊孤峰突兀聳招提亭噓大壑千帆盡
寺繞寒空萬堞低天地對懸南北影雲霞不斷古今題
憑高一片真堪畫縹緲樓臺鐵甕西

百尺危闌坐振衣白雲蒼霧滿禪扉
天空一柱中流出日午層濤四面飛
秋色帆檣淮甸遠暮鐘樓殿廣陵微
重來為構焦君宅對狎青山住海沂

曳履千盤到上頭蒼烟寒梵滿清秋
闌干曲抱孤雲色殿閣飛懸大海流
日落龜鼉時自語風高鴻鵠晚仍留
蓬萊咫尺堪乘興坐倚芙蓉望十洲

一峰塵外聳巉岼屹立青螺鏡裡看
萬古乾坤誰卓錫三山濤浪此憑闌
秋空蜃氣連江暝夜久龍宮上日寒

何處玉笙吹不斷五雲樓殿滿長安

江右鬼父佳父二王孫以書翰見貽賦此寄贈
紫氣豐城望不窮雌雄龍劍拂長空持觴並入蓮花社
卜築同依桂樹叢天際碧雲迴錦字石邊流水傍絲桐
青帆咫尺堪乘興為借潯陽一夜風

寄曹山人子念

大雅曾聞郢客操蒹葭何處夢魂勞青萍夜嘯吳門月
白舫晴飛震澤濤海岳壯心藜杖遠乾坤秋色草堂高

西風是處堪乘興相對蘭陵把濁醪

寄朱可大進士

曾共長楊謁聖君一鳴龍種獨空羣彤墀未捧千年日
紫殿先傳五色雲花氣上林春浩渺酒香韋曲晚氤氲
酬知莫問馮驩缺片片霜華落斗文

登臨安鎮海樓

郡閣冥冥霧雨開蓬瀛遙望氣雄哉千檣畫挾潮聲下
萬樹晴飄海色來策石舊傳秦帝輦還鄉初見越王臺

高歌且遂乘桴客莫問安期早晚迴

蘇君禹觀察抵武林以手札詩扇附李參知見
寄且勸駕北上意甚惓惓感事賦答二首

論文曾駐木蘭舫按部長懷使者勞豈謂青衿還絳帳
尚從黃綬問緇袍書傳大禹千秋穴賦湧靈胥八月濤
不是輜軒頻顧盼桐君山色為誰高

雙鴻迢遞問柴荆片鷁猶思下婺城祇媿烟霄勤物色
能從湖海擅時名遺音空谷聞三嘆大樂明堂重九成

莫向雲泥論出處乾坤何地不堪盟

仲秋北上次武林謁大中丞滕師招飲賦謝

錦瑟沈沈夜未闌胡床明月坐來寒抽毫久媿門人籍
仗劍重登國士壇一壑龍門懷豹隱千山燕闕話鵬搏
青帆咫尺臨安路躑躅河橋去住難

中丞滕公遣人舟傳送渡江賦謝一律

十年雲水斷風塵一為酬知謝隱淪擊楫豈容高卧士
飛檣聊作浪遊人長康破冢應無恙逸少臨池合有神

無奈夢魂秋色裡白蘋紅蓼喚垂綸

王右軍有借船帖

別蘇觀察君禹作

曲檻迴廊玉署開高雲斜日共徘徊縱橫大筆生徒候
慘淡長裾客子來狂擬持竿眠漢闕老堪攜策傍秦臺
飛查斃乞銀河去拾取支機萬顆回

君禹病瘥二月餘余過訪不能數語情殊戀戀
途中追憶再成二律奉寄

一舸蘆花正夕陽題詩秋色照河梁風驚宋玉三秋髩

露浥相如萬古腸
劍色飛揚閩海外
琴心憔悴越溪傍
途逢伯樂應相笑
幾度鹽車扼太行

隻字風雲逐彩毫
雙絨雨雪問綈袍
朱顏揔為懷人瘦
綠鬢能無課士勞
歌徹四愁神已王
篇成七發興逾豪
何當一喚枚乘至
萬疊吳山望海濤

周元孚過訪見贈奉答時元孚方有南都司馬之擢

翩翩詞客氣凌虛
朗潤周郎玉不如
佐郡蚤持三尺劍

安邊頻著萬言書霞飄雞舌黃金殿霧擁螭頭白玉除
四百樓臺春雨後看花何處不停車

為周元孚悼亡

百琲明珠照畫樓閨中林下並難儔新詞盡壓周公瑾
絕唱先傳宋子侯落月素琴千里夢西風團扇十年愁
亦知王母遙相憶肯放雙成到白頭

古樂府宋子侯
有董嬌嬈曲

十幅鸞箋麗彩雲雙飛龍劍惜離羣哀傷奉倩傾城語
慟絕安仁祭墓文夜雨乍堪琴瑟斷春風長憶珮環聞

天台咫尺誰攜手落盡桃花越水濱

送喻邦相移任雲間

剖竹新分大郡符
朱軒華轂照行途
雲驅五馬朝辭越
霧擁雙龍夜入吳
重遣民歌麥穗盡
搜奇士出菰蘆
雙旌遍閱閭閻後
釃酒能過二陸無

夜登鎮海樓
月色瑩然萬里如畫
因憶王長公
元美時方以司馬應召南都

登壇初卸黑貂裘
玉宇無聲夜色流
十萬貔貅環漢幟

三千熊虎抱吳鉤
歌傳桃葉清江上
曲奏梅花大海頭
徙倚胡床豪興發
不知明月墮南樓

寄周元孚

含香猶是舊蓬萊
躍馬長干定幾迴
擲管客留鵷鵲殿
吹簫人去鳳凰臺
黃陵異日傳仙夢
赤壁今時擅將材
見說秦淮春滿座
新詞何限篋中裁

元孚方失偶而主
駕部事故有鳳臺

赤壁
之句

寄懷少宰趙公

衣冠何地不蓬萊
大府晨趨百吏來
拄笏雲霞流十廟
浮查河漢接三台
牛頭寺古尋僧去
燕子磯寒送客回
屈指鹽梅飛詔下
調羹人在鳳凰臺


大司空潘公寄示河渠諸剌卒業賦此奉贈

巨軸高懸照紫霞
平成功就世誰加
渠通上國三千里
堰護長淮十萬家
匝地甘棠偏捧露
參天垂柳不需沙
傍觀漫自工萋菲
白髮臣心盡海涯

寄答劉君東孝廉時新剌乃族祖子高職方集

成

邂逅長安握別年清源一望路三千
雙龍豫野偏藏匣片鷁潯陽未放船
玄草閣深天寂寞赤松亭古地蔥芊
當筵朗潤真如玉為憶永清夢寐懸



少室山房集卷五十

欽定四庫全書

集部

少室山房集卷五十二

詳校官編修_臣翟槐

侍讀_臣孫球覆勘

總校官庶吉士_臣何思鈞

校對官中書_臣王鍾泰

謄錄監生_臣沈一鶚

欽定四庫全書

少室山房集卷五十一

明 胡應麟 撰

七言律詩八十三首

余君房招同劉子玄胡孟弢盛太父李季宣夜

集言別

攜取靈光下玉墀
敝裘無賴出關時
那堪水部梅花燕
却訂王孫桂樹期
青瑣珮環紅日近
翠微車馬白雲遲

惟應入夢君房筆永夜同過越水湄

將出都丁元父過訪數四且貽詩餞別意甚惓

切賦此奉酬

片語都門醉濁醪黃金臺上共持螯毫端並吐千秋色
筑畔誰當一世豪紫陌天迴中秘遠青山雲淨少微高
花期首探驪龍窟肯著東方賜後袍

南歸留別胡孟弢區用孺李季宣王回伯王永
叔黃季主馮咸父金伯韶八子

陌上東風御柳黃胡姬相對一傳觴
空傳八駿來燕市未許雙蛾擅洛陽
握手虹霓猶意氣關心歧路獨文章
提攜競著南征賦萬疊春山萬里航

贈莫廷韓

時名籍籍尚風塵索米長安歲未貧
囊草欲飛三殿色墨花長洒萬家春
茶烹陽羨過名士酒釀臨邛醉玉人
莫恠相逢談太劇洛中詞客舊為荀

送陳玉叔大參之蜀

握手華陽別思濃
驪駒一曲慙相從
雄風七澤登臺近
積雪三峨問寺重
上客題詩留錦里
佳人攜手醉臨邛
亦知蜀道行偏易
惆悵河橋落暮鐘

同諸子集吳山人叔嘉館二首

一星隨客住長安
折柬能開大將壇
自許含毫新賦就
誰論擊筑舊盟寒
千門北極雲中出
萬寺西山雪裡看
落落乾坤公等在
春明吾豈恨彈冠

春光何地不徘徊
綠酒銀燈別墅開
絲竹東南傳勝事

冠裳西北盛詞才吟呼片月甘泉下坐引羣星太液來
拚取深杯酬令節莫教行屐破蒼苔

湯義少過訪賦贈

看花吾汝又蓬萊彩筆翩翩氣不迴二酉再誇藏穴富
五丁重起伐山才輝騰白壁過秦殿色借黃金上薊臺
蚤晚河東題賦就春明門外共徘徊

懷吳大參

使車何處倚星躔回首錢唐握別年海國蒹葭停鼓吹

江城秔稻滿樓船，千倉轉運飛京邑。十郡催科息市廛，極目後堂絲管在。獨慙經術老彭宣。

聞張助甫擢寧夏中丞喜而有作四首

燦爛除書出帝京，詞壇飛將舊知名。三河擁傳過秦塞，六郡吹笳入漢營。露布夜馳平樂館，風旗朝獵受降城。不須更問祈連道，谷蠡昆邪到處迎。

金甲光搖獬豸冠，玉門西度舊長安。黃河曲抱中丞府，絕漠孤懸上將壇。鏑控流星摧冒頓，旗褰大雪定呼韓。

千烽夜靜天如水一曲梅花上賀蘭

用桓伊事

匣底霞飛玉轆轤壇前月出繡螯弧中郎再問西涼俗

助父舊任甘州

博望先開大夏途令出材官齊候馬吟成詞客

競呼盧亦知記室多哀伏能奏儂家出塞無

廿載登壇識崩維欣傳持節到涼州風高漢壁初行塞
月滿胡床獨上樓驃騎三千呈角觝蛾眉二八奏瑩篴
青油豈少觀碁興目斷關山是隴頭

集劉金吾子大第作

耀馬春光上苑來
華堂絲竹玳筵開
含杯四海俱同調
授簡千秋各異才
縹緲長虹懸帝闕
熒煌太白動仙臺
共誇此夕金吾宴
肯信花前玉漏催

同黃季主金伯韶兩生過伯符宅時傅明府先
在坐

殘雪初回萬井春
一尊官舍暮留賓
抽毫太液多名士
擊筑長安盡酒人
慘淡驥心逢處老
飛揚龍劍合來神
盤中苜蓿猶堪飽
莫放仙鳧去紫宸

是夕明
府先行

送盛山人泰父奉母南歸

風色蕭蕭散酒徒，一蓑隨處占菰蘆。
將親南下非潘岳，逐子東還是大姑。
殘月夜投瓜步遠，斷霞朝擁石城孤。
飛流百尺蘭陰下，倘覓玄真舊釣壚。

天津訪趙夢白邀同林登卿夜集並遲陶別駕
不至

玳瑁筵開集彩毫，侍臣相對此持螯。
雙星碣石盟初聚，十日平原氣並豪。
畫省白雲三輔色，牙檣明月九江濤。

論心是處堪長夜悵望王祥隔珮刀

夢白業留余為三日飲余迫歸解維辱遣人追
送百里并出橐裝為贈賦謝此章

追懽能復少年場意氣偏君重太行脫劍青天明海岱
抽毫白日動河梁窮途欲慣虞卿屨絕塞翻疑陸賈裝
歸去故園蓬鬢在下機寧似出咸陽

暮登太白樓望岱宗題

闌干十二挂城頭百尺飛甍暮靄收醉客千秋曾上坐

詞人萬里一登樓
天門月並長庚出
日觀雲吞大海流
屈指蟠桃歸曼倩
騎鯨八極問離愁

再過婁江訪二王先生二首

百里婁江路未遐
丹砂重問葛洪家
飛花似識尋源棹
古木如停上漢槎
織女機頭長日月
秦人洞裡遍雲霞
相逢莫話河東賦
一出春明鬢已華

拂曙吳門一棹開
尋真何啻入蓬萊
蒼虬欲傍遙天下
黃鵠仍看大海來
玉樹雙莖懸帝坐
瓊花萬里落仙臺

亦知樵斧千齡易，敢道平原十日迴。

長公偶以小恙為余強起，卧榻間隱几對談，聞
二晨夕迫歸，告別意殊戀戀，再賦此。

落日長松半榻懸，科頭相對欲忘眠。無勞香積千人供，
默會維摩萬古禪。跨鶴共觀滄海上，驅雞遙赴白雲前。
由來肺病文園事，贏得清虛是大還。

舟泊樵李沈純父邀同陳茂才登烟雨樓

泠然清興逐菰蒲，萬頃玻璃浸畫圖。水泛瀛州環疊島，

山懸方丈插平湖傳聲簫管時聞越倒影樓臺盡入吳
昏黑更須臨絕頂蚤知能賦屬吾徒

寄趙夢白計部

秋夜夢與夢白
論文久之因寄

落月梁間夢寐懸風神猶憶對床年官仍大隱金門後
帝問長庚玉座前白馬看花孤閣霧黃龍飛粟萬家烟
他時倘躡虞卿屨醉舞平原十日筵

佩玉初辭漢苑春鳴榔十月下天津由來辨馬無先達
誰道騎鯨不後身雙闕雲霞高隱吏五湖天地獨歸人

江東渭北論文夜愁絕邯鄲夢未真

寄余君房

中朝詞賦舊名家握手都亭興未遐
北極衣冠頻視草西陵環珮日看花
聽雞長樂千門月立馬新豐萬樹霞
却望四明雲霧裡少微星色傍誰賒

過崇德訪朱可大留飲呂明府園亭二首

握手天涯話舉杯河陽花色照徘徊
當年擊筑豪燕市此夜鳴琴坐越臺
龍劍千秋牛斗合羊裘萬里雪風迴

雙鳬莫問王喬舄爛漫恩光漢闕來

寒雲一逕入烟蘿斗酒相逢意若何捧日乍看威鳳舉
垂天誰問大鵬過千門樹色深桃李十里花香散芰荷
經國文章吾汝在肯緣華髮嘆蹉跎

送趙太史之留都

錦纜錢塘霽色開題詩先寄鳳凰臺投簪未許文園渴
前席仍看漢殿迴瓜步月明滄海近石城雲起大江來
青藜豈獨仙曹借咫尺寒光到上台

同喻邦相別駕話舊作

高秋帆挂大江東屈指清尊碣石同一去鴻書迷遠近
重來龍劍合雌雄錢塘雪捲千家白石屋霞生萬岫紅
何限勝遊天竺頂與君攜屐待秋風

重來河朔問風流握手天涯各倦遊足馬乍堪題柱返
雙鳬曾是佩刀留平分水月眠官舍獨占湖山坐郡樓
簫鼓畫船君但飲至今人羨白杭州

楊思悅茂才招同沈侍御金觀察李山人集湖

上得長字

陰竹穿蘿一徑長
誰專別墅在錢塘
尊攜北海千秋色
座納西湖萬頃涼
上客風流元賈馬
中林詞藻盡求羊
棲遲十載談玄意
白髮雲天卧草堂

子念承父過訪同集喻邦相署中

斗酒山城薄暮開
蘭陰攜手一登臺
白雲漢殿鳬雙下
紫氣吳天鶴並來
席上雄心時慘淡
尊前狂態各徘徊
桃花滿路看明發
遮莫青藜洞口迴

承父將
遊天台

顧觀察維舟澱水招集

斧鉞輝煌漢使才，曾同作賦上燕臺。
昆明萬里浮槎到，澱水千山列座迴。
潮起魚龍窺鼓瑟，月明烏鵲傍含杯。
瓊筵不是征西興，肯許名流達曙陪。

夏日郭方伯沈侍御李祠部金大參招集祐聖

道館四首

其二補
六卷尾

駿骨燕臺事有無，看花重入舊玄都。
談詩客豈唐供奉，作賦人俱漢大夫。
疏畔虹飛滄海近，毫端霞起赤城孤。

何須遠締平原約到處黃公是酒壚

玉殿瓊樓坐太清追隨仙侶到蓬瀛
天垂越國星文聚地擁吳山雪色明
嘯傲琴尊仍北海招攜環珮盡西京
狂歌不信雙龍合匣底芙蓉夜夜鳴

飄零華髮塞門迴結社錢塘闢草萊
江左才情饒陸謝梁園賓客擅鄒枚
含杯象緯中天出握麈虹霓大澤來
好為湖山留勝事抽毫同上越王臺

贈顧不疑山人

癡絕曾聞顧虎頭諸孫文苑尚琳球書飛白鵲霞光動
劍舞蒼龍雪色流獨訪秦封過秦岱遙探禹碣上岵嶠
玄亭寂寞歸來事乍許侯芭一校讐

答卓漱父

相逢裘馬自飛揚握手湖山興欲狂俠比王孫居蜀郡
人如宋玉在高唐

漱父美風儀而一姓宋

千金再散名逾重百石

纔沾意已忘不爽芙蓉涼夜約月明簫管到橫塘

小飲楊思悅館

裘馬飄零漢殿迴為君重上越王臺廿年蘿薜玄亭老
一畝簷簷白社開共醉不妨中聖酒先登誰是大夫才
揚雲世業猶堪守莫羨平津到上台

題齋中五岳圖

有序

余髫髻即有五岳之懷頃歲疾病糾纏尚平
之興鬱焉莫遂因築室曰臥遊而繪五岳壁
間每撫琴動操則衆山泠泠響答岩谷几席
之上白雲翳然而生不知此身匏繫於塵世

也爰各綴七言一章俾同余所好者歌之

絕嶠橫空礙斗牛孤松百尺挂蒼虬中峰萬仞雲霞合
巨壑千盤霧雨流玉節恍疑青帝下金泥誰侍素王遊
飛龍為訂扶桑約獨探紅輪大海頭

右岱

玉殿瑤臺跨紫氛雲璈霞色半空聞龍游尚憶重華駕
鳥迹長留大禹文翠岫陰森巫峽雨蒼崖明滅洞庭雲
誰同躡屩尋仙去天柱南頭喚鶴羣

右衡

杖底明霞照玉杯
黃河清洛互縈迴
乾坤四望鴻荒盡
日月中懸混沌開
大雪恍留初祖卧
飛雲如扈上元來
三花爛漫吾將去
為憶當年絕頂栽

右崧

峭壁峻嶒霧雨愁
明霞天畔削瓊樓
金仙示跡猶存掌
玉女含顰未洗頭
大壑風生羣虎過
飛崖雲滑斷猿愁
何當盡掬黃河水
濯足蓮峰話壯遊

右華

絳宇琳宮跨絕巔，大荒亭堠正蒼然。
懸崖盡壓秦城外，峭峽平分漢壁前。
雷電九霄摧裂石，虹霓百道挂飛泉。
狂來欲起搏鵬翼，倚杖徐看北斗懸。

右恒

蘇君禹觀察過訪奉贈四首

魯國諸生望後塵，爭傳環佩上星辰。
那知紫極攀龍客，來訪青山抱犢人。
日射蓬萊雙闕曉，霞蒸桃李萬家春。

長裾不厭他年曳自棹孤航向七閩

大纛頻年別武夷高牙仍為白雲遲乾坤驟向論交合
日月旋從握手移一代文章明主問三朝蹤迹世人疑
狂來漸作襄陽態高唱銅鞮岨接羅

翛然一曲住岩阿十畝橫塘半芰荷隙地祇容凡鳥占
垂天曾是大鵬過傷心萬事歸玄草把臂千秋在綠蘿
東望扶桑豪興發欲飛椽筆鬪銀河

賦日初從漢殿迴談天重上越王臺雌雄乍合雙龍氣

牝牡那分八駿材
曳杖虹霓東海出
披襟雲霧北辰來
亦知傾蓋元如故
可道浮蹤隔草萊

送司馬蕭公入都

奏凱千官夾道迎
欣傳司馬入承明
嚴兵立偃三千甲
謁帝初迴十二營
丞相經綸懸玉壘
老臣方略擅金城
丹青細數凌烟上
橫槩誰兼大雅名

徐茂吳過訪賦贈

十載形容夢寐看
江天雪色對盤桓
貧如厭次長為客

渴比臨邛自罷官日湧虹霓雙劍聚天垂星斗一枰寒
春風爛漫湖頭約萬樹桃花覓翠巒

王司寇還自金陵寄訊四首

百辟衣冠餞道傍瑯琊雲色倚徜徉千秋職位符司寇
一代文章擅子長乘興已迴婁水棹遂初聊記弇山堂
鱸魚正熟金閭外斜日秋風盡意嘗

長公先任南司馬
繼以司寇歸故額

聯云

日夜丹青問草萊老臣銜命一徘徊三天澤降龍仍臥

八極祥呈鳳已迴劍佩諸真朝絳闕笙鏞羣帝集瑤臺
從知六翮扶搖上倘許初平叱馭陪

長干一葦破江烟瓜步千花照別筵祖席衣冠高座寺
歸裝環珮大羅天白牛馴擾金田下玄鶴翱翔玉洞前
極目五城樓十二不知何路向梯仙

咫尺行藏見大機婁閭晴色正熹微千身水月尋常現
八翼雲天自在飛核種西池桃已熟苗長東海蕨初肥
太湖萬頃家林外為報君王已拂衣

天恩勅賜為楊明府題

三策當年動草萊鳴琴百里蹇徘徊園開五柳雙鳬駐
戶植三槐駟馬來慘淡高風神武闕熒煌新命建章臺
承家宓子飛揚甚屈指龍光到上台

答陳司理汝立

誰人得似陳公子散帙高齋坐晚衙白馬風流初佐郡
金門詞賦舊承家雲霞明滅看天姥島嶼縈迴泛若耶
若問胡郎婚嫁事赤松原上近移家

贈楊明府楊為中丞滕公內弟

十載通家問草玄
龍門愁望大江懸
棲遲廷尉辭賓日
藉甚仙郎作令年
越渚蘋香迴岝嶺
情吳城花色照鳴絃
由來百里非賢路
屈指雙鳬帝座前

喻邦相將還括蒼寄此

咫尺飛鴻墮草堂
盈盈秋色限河梁
神交不道千峰隔
病卧翻憎一水長
玉樹過雲天縹緲
金莖承露月微茫
西風未下觀濤興
七發行傳大海傍

時以病留郡城得善洞蕭者月夜聽

之遂漸有
起色云

朱在明過訪作

廿載重逢各鬢皤
追驪寧問夜如何
華陽社逐浮雲散
澌水船將片月過
竹逕談棋雙鶴下
蘿軒明燭亂蛩多
那辭醉作他鄉客
百斛蘭陵任嘯歌

寄問喻邦相病時中秋前二日

咫尺牙旗越水頭
招尋猶滯木蘭舟
羊裘萬里歸風雪
龍劍三旬隔斗牛
沈約病餘偏瘦損
虞卿書就任窮愁

生憎後夜雙谿月獨照胡床八詠樓

陳玉叔書來賦答

驚人曾覩孟公狂作吏咸推仲舉良
劍合飛龍延浦外書傳迴雁洞庭傍
薇垣夜醉三千客荔圃晴深十八娘
莫詫宦游專勝絕將因題賦入長楊

吳文仲與余訂約淨慈昭慶間屆期往晤則文
仲尚未至也余迫歸不能待意甚悵悵走筆
寄吳

春風晨駕木蘭橈十里平湖正落潮
萬壑霞光靈隱近
千峰晴色淨慈遙參差玉珮縈朱陌
錯落金鈿照畫橋
惆悵美人期未得一筇何處問宮雉

舟中寄別祝文學鳴臯

薊門秋色近何如憶汝倉皇賦索居
千里寒風晨挂席
萬山殘雪暮驅車形容漸老歸時鬢
意氣偏懸別後書
為報武陵花滿目青鞋吾欲伴樵漁

過晉陵哭陳生穉冲

握手京華意氣投，風塵馳驟兩騅騑。
人間未識青藜杖，雲際先歸白玉樓。
溟海煙濤橫赤鯉，亂山寒霧擁蒼虬。
吞聲欲挂留徐劍，蔓草何因識故丘。

寄姚安楊使君

匹馬天南客夢孤，一麾迢遞問蒼梧。
魚龍夜度昆明水，虎豹朝行貴竺途。
草檄共看司馬後，題詩曾吊謫仙無。
燕山越嶠空回首，愁絕都門舊酒徒。

舟過吳門奉懷王太僕元美祠部敬美兩先生

時俱在

燕中

玉樹雙瞻漢苑才分曹清切侍蓬萊何年海岳鍾元氣
幾夜星辰接上台草夢春生鴻雁渚花香晴憶鳳凰臺
遙憐作賦登高處萬里浮雲大漠開

聯珮翩翩碣石宮陸家兄弟摠稱雄雲霄忽訝雙龍合
朔塞平看萬馬空東觀圖書霞色裡西園車蓋月明中
塵蹤十載虛相憶寂寞孤舟自轉蓬

夜同俞蔡二子集楊茂才館

一尊岐路暫追扳詞客相逢鬢已斑
海內詩名誰白雪人間愁色共青山
浮雲西北孤帆迥明月東南萬壘閒
道是子雲幽興在不妨頻夜扣玄關

寄燕中友人六首

有序

諸子皆燕市舊交自余南還音問疎
遯離索之懷日形夢寐爰詩寄焉

誰向風塵問謫仙相逢賀監自飄然
青春畫省追遊地白首金門侍從年
柳色乍分燕塞底梅花長憶嶺雲前

佳期慘淡瓊瑤隔愁對孤城落日懸

右嶺南
黎惟敬

江左曾聞第一流攜書京洛幾同遊風塵杜甫三秋鬢

湖海元龍百尺樓染翰白雲飄薊野看山明月冷吳鉤

狂歌寂寞當年事何處逢人賦四愁

右吳門
周公瑕

慷慨京華憶舊蹤交遊南楚得元龍新豐市裡三春酒

長樂宮前萬戶鐘野客心情懸薜荔故人肝膽托芙蓉

長安極目征鴻阻愁向衡陽第一峰

右麻城
丘汝謙

長嘯秋風問解攜黃金臺上幾扳躋霜飄鼓角中原靜

霧捲旌旗太白低伴直每趨三殿曉看花時出五陵西

相思共拂張華劍莫使寒光暗鷓鴣

右秣陵李惟寅

天末寒風起暮秋碧雲翹首倍添愁都門俠客空彈劍

日下歸人已倦游十里鶯花桃葉渡半帆烟雨木蘭舟

攜家早赴青山約寥落羊何阻唱酬

右永嘉康裕卿

把袂都亭木葉稀陽關一曲轉依依天邊劍拂長虹斷

海上帆侵暮雪飛蘭杜欲紉湘女珮菱荷新製楚人衣

相思何處偏惆悵獨夜寒空望少微

右濠梁朱汝修

送謝中丞入都

劍履輝煌入漢闕蒼生遙指謝公還
千營夜發鯨鯢靜萬戟晴開虎豹閒
紫電朱旗分野色赤霄華袞近天顏
承明幾度看花暇飛夢猶過海上山

不佞隸博士籍五載餘迥遊京師不為當道所知
今歸業且謝去迺辱督學滕公物色風塵擢之異等
而且脫略師生罔間形迹青衿之遇近代所無感德酬知輒復賦謝二首

落鬼風塵幾歲年
凌雲豪氣自翩翩
持竿欲挂珊瑚樹
挾瑟重登玳瑁筵
吏部聲華唐闕裡
長卿詞藻茂陵前
無論國士今難遇
萬古夷門白日懸

極目孤雲大海平
夕陽千里共含情
關前一雁凌秋起
匣底雙龍繞夜鳴
中散形骸元傲世
婕妤容色豈傾城
酬恩亦是書生事
愁絕江淹賦未成

寄李環衛惟寅

時鄉人以惟
寅燕中書至

十載長安道路分
傳書重覩信陵君
千行淚盡吳天雪

一字神飛越海雲
夜帳梅花孤鶴遠
秋齋梧葉片鴻聞
狼煙淨掃居胥外
好乞班生石上文

黎惟敬得告還南海過余草堂話舊信宿別去
着繡看君海上遊
白雲攜手問丹丘
中郎舊業藏金馬
內史新書滿玉樓
山水十年桃竹杖
關河千里木蘭舟
題詩莫向羅浮頂
片片梅花引客愁

春日韓使君過訪

韓名邦憲亦
最燕中社人

十二樓臺擁帝京
一時才子最關情
分符已奏淮陽績

授簡仍追鄴下盟
袖拂驪珠江月遠
先生龍劍海雲平
狂遊轉憶當年態
萬井烟花宿鳳城

同諸友分賦臨安十景二首

萬松嶺

峭壁層崖萬仞開
離離松色隱崔嵬
雲排鐵幹蒼龍舞
月滿瑤枝白鶴來
幾夜秋濤翻客枕
半林寒影挂仙臺
虛疑日觀烟霞古
寂寞秦封半草萊

玉蓮亭

潑灩晴光一鏡寬
漢宮羅綺畫中看
風搖翠蓋凌波出
霧洗紅粧映日寒
太液池邊香自繞
若耶溪上采應殘
莫教腸斷金陵客
載酒重過白玉欄

少室山房集卷五十一

欽定四庫全書

少室山房集卷五十二

明 胡應麟 撰

七言律詩八十三首

郭方伯以三詩見贈賦此奉答

新詩題贈遍瓊瑤握手龍門路未遙
姓字三朝傳岳牧風流一壑伴漁樵
芒鞋石室雲隨杖桂楫金沙月滿橋
極目錢塘秋漸爽一尊同賦大江潮

秋日張使君招飲湖上作

綠楊紅蓼半斜曛
錦纜牙旗蕩潑紋
水面樓臺千剎繞
波心城郭萬家分
洞當靈隱偏藏雪
峰到飛來盡入雲
無限畫船秋色裡
歸途風雨濕羅裙

送屠長卿北上

十日爐頭問酒頻
春明迴首各風塵
朝攜一鶴還青浦
夜扣雙龍入紫宸
霞色薊門供傲吏
雲花天姥臥閒人
中朝手定明堂禮
莫忘襄陽賦有神

中丞蕭公自關中來越喜而有作

玉詔輝煌下彩鸞
朱旗遙捲出長安
天南再擁中丞節
渭北初辭大將壇
別墅談棋千障肅
胡床吹笛萬峰寒
西來小隊能多暇
山色湖光次第看

顧觀察維舟潑水招同王承父燕集追暮廼別
江天攜手一尊同
錦纜牙旗夕照中
十日平原今再見
千秋河朔定誰雄
渾疑白社開薇省
共向青山覓桂叢
寂寞黃金臺上事
西風吹墮北來鴻

送唐刺史之洛中

分符新命下明光
坐擁單車赴洛陽
六載風期懸夢寐
一時聲價動循良
先春苑雪飄行蓋
薄暮嵩雲到訟堂
絕頂三花尋少室
何人相對話胡郎

送吳文仲入都

片語溪頭問鷗冠
驪駒催發向長安
金華洞壑神仙吏
玉殿星辰侍從官
東漢循良傳賜履
西曹詞賦接登壇
嘉隆數子盟仍在
肯放陽春屬和難

司馬汪公伯玉拉余過海上訪兩王先生適司
馬張公肖父同日至留集弁園者三宿澹圃
者再實一時之盛事因成七言四律紀之

名園樓閣麗丹霄握手千秋意氣饒日月雙懸婁水近
星辰羣下越臺遙探書題柱俱司馬飛鳥吹笙並子喬
獨有侯芭長寂寞玄亭相對髮蕭蕭

張公蜀人汪公適
由越至王喬一緇

嶺周人一
葉縣漢人

秋光何處一尊同十畝平泉眺望中鶴駕並留孤島上

龍泉重合大江東星懸析木三垣紫日擁扶桑萬界紅
矯首乾坤才欲盡那知人在闔閭宮

飛僊環珮入蓬萊木落霜清萬象開宇宙文章傳四子

東南名勝屬三才

曹子念汪仲淹仲嘉同集

丹成鸞鶴中天下樂奏

魚龍大海來七十二峰雲霧裡憑將奇句勒崔嵬

屈指詞場大業新輜軒離合並傷神重逢洛下含杯客
半是華陽授簡人一代風期留管鮑百年金石聚雷陳
相看忍賦河梁曲荏苒垂虹挂月輪

贈王瞻美

玉樹王家並寡儔
翩翩羣從見風流
烏衣不愛諸郎坐
白恰偏從二美遊
婁水林香晴荷鋪
石湖花暖夜維舟
恠來雙燕頻相認
玳瑁堂深貯莫愁

王宗伯督學招同張汪二司馬王長公次公洪
山人汪太學同集團亭賦

十載玄亭夢寐過
登龍此日並羊何
闕前紫氣飄槐棘
海內蒼生問蓼莪
一代文章諸老盡
三朝禮樂二難多

亦知元禮門風在，揔為名流到綠蘿。

重九舟中懷汪司馬

何人同賦仲宣樓，爛漫黃花引客愁。
一片秋光隨越舫，萬家寒色到吳鉤。
波濤震澤神龍過，日月天都彩鳳遊。
依舊六橋荷芰滿，不堪明夜大堤頭。

送徐觀察之嶺北

繡斧朝持出漢宮，提兵遙赴粵臺東。
三江雨色雙帆靜，五嶺霜華一劍雄。
虎帳分宵延上客，貂裘移日候元戎。

胡床不淺登樓興，萬里遙瞻碣石鴻。

陳觀察過草堂余適遊金華山中不值

西風遙駐越江船，竹逕深慚問草玄。
星斗乍看題鳳日，雲霞長護牧羊天。
秋明斧鉞羣山外，夢隔旌旗一水前。
莫說雁南風景絕，平津開閣候登仙。

送徐方伯之江右

飛動簷帷出帝京，漢庭才子舊知名。
驚風蠡澤揚帆下，落日匡廬攬轡行。
鉞柱蛟涎秋盡洗，石函龍氣夜雙明。

為知到日滕王宴四座爭攜彩筆迎

閩中謝文度以詩及新集見貽賦答

一函飛雪下江魚慚愧同聲驟起予
松菊滿栽彭澤徑
蓬蒿深葺杜陵居乾坤萬事懸車外
日月雙峰伏枕餘
不遠龍門堪汝過幔亭雲色定何如

題徐大叅瞻雲堂

負郭新看一逕成金華山半入簷楹
喬松不斷瞻雲色
寸草長懸愛日情檻外翔烏餘涕泪
樓前馴鵲動悲鳴

莫言遺恨終天抱屈指徵書下帝城

顧觀察益卿過訪

衡宇飛花暮不扃傳呼車馬到林垌何來海岳稱同調
是處乾坤問獨醒一水近拖揚子白千山遙墜夜郎青
莫言寂寞揚雄臥旌節分明駐草亭

題凌使君別業

別業吳山之上
用使君韻作

五畝青山自結廬欄干十二坐幽虛烟蘿地近揚雄宅
水竹天成杜甫居海色千家潮落後湖光萬頃月明初

飛花遶徑誰相過一卷黃庭石上書

送徐大參入都

飛旌長夏問京華紫氣蒼茫越水涯南國芝蘭初映日

西秦桃李並成霞三朝吏績推前輩一代儒宗見大家

翹首秋風天闕近夜看牛斗落仙槎

先是公山房產
芝草數十本

嶺右張使君闢園城中臺榭池沼皆桂林勝絕

處予聞竊嚮往焉賦得六題

露暖長空片月流闌干十二倚丹丘千山霽色飄銀殿

萬頃寒光抱玉樓
曳杖迴疑天柱過
吹笙長憶廣陵遊
當年莫奏開元曲
燦爛星河落翠裘

右清虛閣

曲曲雕闌面面霞
何如蓬島問仙家
客來精舍談雙樹
人倚名園坐百花
翠合暮雲流藻井
紅分朝日上簷牙
啼鶯滿徑壺觴在
長伴羊裘閱歲華

右叢芳館

疊嶺高盤挂夕霏
雲光霧色亂侵衣
雙鸞夾漢青疑墜

萬鷲摩空翠欲飛
北望星辰懸帝座
西來水石護禪扉
他時倘共商山客
日荷長鑱賦采薇

右鳳台嶺

噴玉千尋望轉奇
平開十畝漾漣漪
閒花弄色全依砌
古木叢陰半入池
雲合四山龍起夜
露濃三徑鶴來時
吹笙自是神仙客
暫逐雙鳬到鳳墀

右來鶴池

淥水微茫漲碧空
佳期誰向大堤同
冰輪兩岬飛明月

玉柱三天駕彩虹殿閣半浮朱舫外笙簫時出畫闌東
宜人最是新秋色十里芙蓉一夜風

右霽虹橋

突兀羣峰倚碧臺如登方丈入蓬萊天垂象緯三辰列
日射雲霞五岳迴幾夜漢槎孤泛到何年秦策並驅來
從知帝夢思良弼莫訝商岩產異才

用傳說
列星事

右三台石

送顧觀察之薊中二首

白羽初停越水湄，彤庭北顧璽書馳。
清霜八郡飛長戟，積雪三邊照大旗。
異代勲名麟閣並，生平骨相虎頭奇。
新芻滿甕蒲萄熟，誰共襄陽醉接羅。

銅柱威名播粵都，樓船勲業遍江湖。
行邊首定周王策，出塞新分漢使符。
倚劒蒼龍鳴涿鹿，揚鞭白馬照飛狐。
從知幕下多詞客，彩筆班生定有無。

寄歐楨伯水部

時鄉人以楨伯林陵書至

明時大隱謫仙來，紫氣千門建業開。
幾夜獨吟鷓鴣觀，

何人同上鳳凰臺
楊花拂雪壚頭臥
桃葉乘潮渡口來
莫問羅浮峰四百
一官原合近蓬萊

方伯滕公起任嶺南喜而有作

十載蒼生望未平
雙旌遙赴越王城
朱明洞啓霞光待
大庾山將雪色迎
四岳輶軒聊海甸
三台劒履漸承明
新題滿勒飛雲上
銅柱誰誇漢將名

寄易使君

獨把芙蓉越水湄
青衿長憶問奇時
虛疑剡曲帆來近

轉愧延平劍合遲
指顧風雲隨八翼
踟躕歲月上雙眉
青山萬疊黃堂外
拄笏誰同望武夷

聞王長公元美再起南都司寇走筆奉寄

時有傳長

公已出者

爭傳霞珮出蓬萊
紫氣關前鬱未開
金液好探龍虎地
玉笙聊試鳳凰臺
先秋列叟乘風去
後夜王郎挂雪迴
林屋洞門元咫尺
不妨瓢笠暫徘徊

憶燕中元夜與朱十六童三安二縱遊長安陌

上今脩十載矣山館寂寥再逢茲夕感舊賦
此

鳳輦鰲山出上京長安宮闕暮雲平千枝火樹宜春苑
萬炬金蓮不夜城艷舞嬌歌游客醉靚粧華飾麗人行
江樓此夕頻搔首飽看梅花上月明

歐楨伯南歸過訪賦贈

四十年操秬苑盟秋風遙起挂冠情羅浮絕頂披雲上
庾嶺歸途踏雪行海岱名流誰並數嘉隆詞客半同聲

朱明洞口攜尊日首探梅花寄越城

贈郭隱君為思清孝廉作

大隱華陽不避喧謝家庭砌盡芝蘭西池鸞鶴扶雙壽
東壁麒麟抱二難紫綬定加萊子服青藜長伴竹皮冠
八千歲月靈椿在一誦逍遙興未闌

送朱孺子還豫章兼寄宗良孔暘崑父佳父四

王孫

蘭陵新綠乍吹醅指點銀鉶為客開雙劍夜持南斗出

一帆朝溯大江迴，鷓鴣五色凌霄翹。
龍種千金歷塊才，羣從兔園應汝候。
彩毫齊拂豫章臺。

江右來相如過訪同唐惟良夜集分冬字韻

嚴陵長日候孤筇，底事芒鞋雪後逢。
結夏西湖眠菡萏，高秋南浦落芙蓉。
人如司馬名堪借，客比梁鴻姓易重。
把臂舊游肝膽在，接羅那不醉雙龍。

敬美使君再起督閩中學聞將于歲杪暫出寄

訊

重飛天詔出彤墀特許看山出武夷雙鳥恍疑雲際現
片帆剛待雪中移七臺高步穿林遠九曲長吟破浪遲
珍重紫陽遺墨在好將椽筆闢淋漓

張使君招飲舟中作

五馬喧傳激水傍含杯猶記舊高陽自呼南郭幽人至
相對西臺御史狂地挾雙流縈畫舸天垂千障落胡床
接離顛倒休辭醉同是當年白面郎

題少玄宗侯冊

玉檢金泥出太常
桐圭花萼遠相望
西園車蓋邀明月
南浦樓船泛夕陽
兔苑登臺無俗客
龍沙開閣有賢王
張筵可解呼王勃
為聽鳴鑾入豫章

孔暘得王中丞所貽西僧自焚灰像因立精舍
奉之乞余作詩先是惟敬永叔諸君咸有題
咏遂繼七言一律

精廬何自布金銀
白足西飛事已陳
鹿苑乍施焚後像
龍池重現劫前身
空門色相元無住
淨土莊嚴合有神

欲起丹霞看舍利摩尼長照大江濱

送喻邦相吳文仲試士省下

畫舸齊飛激水頭潮聲八月下杭州懸心兩地桃花色
縱目三天桂樹秋日上朱衣晴鎖院虹飄彩筆暮登樓
無勞石匣占雙劍並識龍光在斗牛

將過婁江奉訪王長公先柬二首

西風船下越江湄恍入三天問路岐雲滿大羅朝宴日
雪飛中岳夜來時千秋一鉢勞先贈萬里孤筇愧後期

笑殺盧敖遊汗漫丹臺咫尺是蓬池

公與余相聞問十載餘數訂期奉訪

以病不果今秋北上實以踐此盟云

片刺飛揚國士情登龍迢遞闔閭城
一身海岱依元禮雙眼雲霄屬正平
下里乍堪酬郢曲中原能許問齊盟
莫言把臂詞塲晚躡蹻天門象緯迎

初至曇陽觀訪長公作二首

龍篆焚煌列太清鳳簫時落步虛聲
千靈劒佩朝拘翼七聖輜輶候廣成
王母宴時香霧合上元歸處片霞明

騎羊莫問關前客石室初平是姓名

絳宇瓊樓壓巨鰲扶桑晴翠落飛濤攀雲頓覺蓬壺近
望日猶驚泰岱高面貌諸天曾省識風神八極共遨遊
含毫小畢千年事長侍方平醉玉桃

次公於曇陽觀傍新構澹圃落成適余過訪留
宿其中敬賦

青牛西去定誰從賦就歸來學老農醉白堂成初養鶴
草玄亭啓一登龍機雲洛下堪同住梁孟臯橋欲借傭

深夜曲闌池上月萬峰林屋浸芙蓉

又題澹圃一首

築宮猶自傍曇陽空觀惟應侍法王
揚子門庭長寂寞
丈殊臺殿盡清涼
鳴鐘震旦紛華過
就枕邯鄲障業忘
不見西方真樂地
玉蓮琪樹遍金堂

小飲曇陽觀中呈兩王先生作

十年書札滿林臯
先後青雲識彩毫
海內文章司馬擅
洛中才望士龍豪
一珠投處開塵榻
雙壁聯時坐縕袍

餘興正狂那得盡雪花從漲剡溪濤

次公攜酒招遊弇園山池登縹緲樓二首

縹緲飛樓逼漢開河山四望轉崔嵬石驅瀛海千峰立
池劃昆明萬島迴曳杖星辰干帝座吹笙雲霧遶仙臺
莫言緱嶺堪忘世指點遙天鶴馭來

層臺飛觀曲相連彷彿丹梯象外懸半壁霞生林屋底
八窓雲起洞庭前鼇鼉坼藏山夜烏鵲橋成疊石年
醉望玉樓天尺五帝閭誰召筆如椽

再別元美長公

乍喜平原十日留，征塵俄動鷓鴣裘。
南宗敢謂傳衣去，北塞翻同躡蹻遊。
婁水三天雲霧擁，華陽萬里雪風愁。
春花定約漁舟入，相伴秦源到白頭。

寄王次公敬美時方辭督學越中之命

飛詔東來髻未皤，白雲深護洞庭蓑。
乍堪霞珮遊高闕，肯戴星冠出大羅。
紫氣昔緣關尹住，蒼生今奈謝公何。
惟應二仲心偏契，早訂風期在薜蘿。

過樵李懷沈純父

從軍何處覓封侯
落盡梅花倚蒨綵
五嶺雪深楊僕戍
三苗雲合尉佗樓
登壇大業窮猶擅
伏闕雄心晚定酬
一事為君差快意
綠衣無恙住儋州

登甘露臺望金焦作

疊嶺嵯峨到碧天
攜壺秋色暮雲前
樓高北固三千丈
殿鎖南朝八百年
雁鷺驚飛吳苑笛
魚龍亂語蜀江船
東風恍憶銀河去
拾取金焦石二拳

鳳凰臺懷李白題

百尺危梯上紫烟層臺十二鳳遊年天浮楚蜀千檣下
地夾淮滌萬井懸睥睨白雲高闕底闌干紅日大江前
謾誇黃鶴樓中句今古長庚合並傳

訪李惟寅話舊作

一賦河梁事事慵秣陵闕下見扶筇歡心競作逢時態
把臂頻看別後容萬戟天都環虎豹孤航水國釣魚龍
亦知不是封侯骨暫學河汾謁九重

同張幼于潘象安集李臨淮即席作二首

斗酒平原話各天，深杯猶似夢中傳。
青油獨坐元戎幕，皂帽羣超上客筵。
五夜歌聲桃葉底，十年容髻菊花前。
抽毫忍和飛龍曲，月暝長干是去船。

六載華陽賦別離，臨淮此日見旌旗。
悲涼白髮談兵夜，宛轉紅顏任俠時。
萬戶侯真誇燕領，九天人欲問蛾眉。
桃花爛醉春明畔，一騎旋飛到習池。

惟寅已見二毛
余亦安仁之歲

獨遊燕子磯作

曲檻危欄霧色開，憑陵飛閣駕蓬萊。
江山上下千門入，吳楚東南萬舳來。
吹浪鼉鼉街日起，擘壺龍蜃挂天迴。
凭高莫問前朝事，巷口烏衣半綠苔。

奉贈大司馬潘公

瓠子功成帝眷馳，老臣銜命出彤墀。
千門月靜留都鑰，萬竈霜清白下旗。
賓客南樓頻擁嘯，生徒東閣盡裁詩。
極知吐握姬公念，躑躅河梁問路岐。

時公屢致意惟寅
欲余一見余北上

期迫甚遂
不及奉謁

題留餘堂為潘大司馬

朝日堂開雲水濱，
崑山入坐照嶙峋。
騎曹官顯非先世，
駟馬賓多屬後人。
綠野雲蘿長護色，
平泉花木盡含春。
謾將七葉誇門第，
百代勲庸屬老臣。

壽陳茂才

一經垂老意何如，
聞道元龍氣未除。
鹽鐵幾裁文學論，
金銀遙問武夷居。
七臺紫霧飄藜杖，
九曲青霞候草廬。
莫謂漢庭方貴少，
蒲輪旦夕有徵車。

真州逢李季宣

短棹東來不厭遊，吹簫彈鋏下揚州。
風塵作客誰青眼，海岱論交尚黑頭。
薊野長虹千驛路，秦淮明月萬家樓。
相逢合在華陽邸，大有荆高佐酒籌。

泊廣陵懷顧益卿

秋風騎鶴向天涯，路入揚州興轉遐。
有客登樓懷玉樹，何人開觀出瓊花。
壇前橫槩三千幟，橋上吹簫十萬家。
笑殺紫薇今夜醉，布帆無賴宿蒹葭。

聞沈純父將還有寄

南過銅柱絕風塵北望金門戀隱淪
豈菟花前千里客
桃榔樹底十年人
駢驚雪擁名山色
驅鯉雲開大海春
聞道天鷄來旦暮可令宣室遲孤臣

寶應碧霞宮宏麗甲天下其後玉皇閣高寒特
立環以大河東望淮海莽蒼無際余維舟其
下登臨竟日恍然馭風遺世之想為賦二首
積翠中天勢欲翔分明臺殿到扶桑
雲霞上下飛丹壁

日月東西抱畫梁
座裡黃河千舶聚
毫端滄海一盃長
祇今誰識宣城句
搔首騎龍入大荒

斗畔危梯百尺懸
峒飛觀矗層煙
長淮蜃起朱闌外
大澤龍吟碧檻前
抱瑟湘靈時自舞
吹簫秦女欲誰憐
却思香案曾為吏
白晝蓬萊絕頂眠

明上人居少林三十餘年以遊方淮上說法于
通玄禪寺余從大衆諦聽異焉造室玄談遂
至丙夜詰旦留詩為別且訂後期

泠然飛錫下西方久住名山侍法王
持呪毒龍歸藻旆談經馴象過繩牀
諸天日月千花供大地山河一葦航

我亦宿生稱大士相隨七佛赴禪堂

傳大士金華人

崔嵬臺殿入清涼月色天香對坐忘
洗鉢師能容姓字留衣吾欲廢文章
纔叅雪竇人天近共指雲門客路長
計日靈山攜杖去白牛車畔問慈航

沛上懷古寄喻邦相

酹酒遙當百戰塵彭城山色大河濱
攀龍北極非無客

逐鹿中原定幾人
雪浪呂梁飛一舸
日華芒碭駐雙輪
登臺苦憶神仙吏
擊筑歌風望紫宸

次夏鎮謁朱公新祠

巖嶠宮牆跨海隅
巍廟貌鎖清虛
天開雄鎮猶名夏
地擁長堤並接徐
疏鑿歲深頻想像
平城功就幾踟蹰
丹青旦暮思良弼
倘為蒲輪到玉除

寄黎惟敬

辭官不聽上陽鐘
結社遙當四百峰
仙子衣裳餘白鶴

詞人環珮隔蒼龍
浮樹裊雲千色大庾花殘雪萬重
縱是寒梅難折寄可無書札慰遐蹤

惟敬晚年自稱白鶴山人

懷滕方伯先生

矯首玄亭憶問奇
海天愁絕雁來時
清宵跨鶴還方丈
白晝鞭龍上武夷
舟楫尚廻明主夢
衣裳遙赴大羅期
星河未吐吳鉤色
十載寒光珮陸離

初抵都下馮咸父以詩草見貽賦此奉贈

紛紛才子競談天
入洛何人最少年
賦就三都吾欲老

吟成七步世爭傳呼盧雪照咸陽市握麈虹飛碣石筵
寂寞焦桐絃絕久為君重拭漢宮前

同社諸子招遊顯應觀閣得臺字

夾篠千林蔽綠苔飛樓百尺上崔嵬山將華岳蓮花並
嶺學淮南桂樹開隔坐三天懸帝闕凭闌七曜動仙臺
君平此夜成都卜應怪乘槎客未迴

題陳玉叔雪坡草堂二首

平坡飛翠立羣巒大隱新開十二闌秀色適當銀闕墮

清輝疑傍玉樓看歌成郢國千花聚賦就梁園萬竹寒
何似一舟乘興去閉門三日臥長安

城隅一曲抱滄浪有客新栽薜荔裳檻外漁舟迴七澤
座中龍笛到三湘松花暮合陶潛里草色春添杜甫堂
莫向峰頭歌白雪夜驚神女出高唐

答屠長卿

風塵攜手各茫然恍惚西湖載畫船六載蒹葭餘舊夢
萬家桃李奏冰絃雲驅赤驥燕臺下電繞蒼龍魏闕前

莫羨初平能辟穀餐霞曾謁大羅仙


再贈長卿明府

繽紛詞客盡西京赤幟誰持大將營
司馬賦才元絕代文房詩律舊長城
霞光若木飛三島雪色扶桑射四明
漫向石函占紫氣雙龍齊傍薊臺鳴

幔亭雲氣圖壽陳徵君作

當年詞筆擅靈光白首青袍厭舊行
曳杖少游行下澤吹簫仲舉在長楊
庭前玉樹森蘭桂闕下瓊花憶棣棠

咲指幔亭歸路近鐵船高繫白雲鄉



少室山房集卷五十二